

Segun tecnico di sonido Bencho Giel:

MUSICONAN MESTER SIÑA CONOCE NAN INSTRUMENTONAN MAS MIHOR

**** BENJAMIN ALONZO GIEL, mihor conoci como "BENCHO",** den un entrevista esclusivo cu DEN AMBIENTE a comenta tocante loke a pasa durante e prome anochi di pre final di Calypso contest den Club Bonaire.

E prome anochi manera tur hende sa cu tabata tin masha hopi tardanza pa motibonan di problemanan tecnico, cu a pone cu e contest a termina te den oranan di marduga, cual a crea e impresion cu e falta ta sinta den e tecnico di sonido.

Bencho a declara enfaticamente cu **NO TA BERDAD**. Segun e experto di sonido cu ya tin 10 aña di experiencia den e ramo dificil aki, cu e tardanza a ser ocasiona pa cierto agrupacionan musical cu a bin cu un aparato computer yama "se-quencer". E aparato aki den ultimo tempo ta ser hopi utiliza pa mayoria di agrupacionan cu no tin

brass-section (blaas-instrumenten). E aparato aki ta un instrumento personal di e musico, pues mester wordo instala pa e propio musico encuestion.

Awor locual a ocuri e anochi ey ta cu cierto musiconan a tuma demasiado tempo pa instalale, esaki ta debi na falta di experiencia. Pa maneha un se-quencer bo mester tin un amplio conocimiento di dje, y no bay experimenta cu ne durante un evento grandi asina caminda tempo ta un factor importante.

Ademas di esaki pa cada cancion mester cambia e programa den e se-quencer. Asta den e esaki nan tabata tin problema cu ne, cu tambe a costa tempo valioso. E unico musico cu e anochi ey a maneha perfectamente cu e aparato aki, tabata **Hildward Croes**. Esnan cu a faya barbamamente cu e se-quencer segun **Bencho**, awor ta purba

di tira e culpa riba su persona.

Asta un di e musiconan ariba stage tabata lesando e manual di e se-quencer na e momento nan ey. Imaginabo con poco e conoce su aparato segun opinion di **Bencho**.

Awor si mira e di dos anochi cual no tabata tin tardanza "att all", y caminda se-quencer tambe a wordo utiliza pa **Hildward Croes** y **Claudius Philips**, ta pa motibo cu nan dos SI conoce nan aparato.

Cu e declaracionnan aki **Bencho** kier a enfatisa cu ora e wordo contrata como tecnico di sonido, e ta tuma su encargo **100%** na **SERIO** y ta bin bon prepara pa duna lo **maximo**, locual e tambe ta spera **mescos** di nos **musiconan**. Na final di e entrevista aki, **Bencho** ta conseha e **musiconan** pa **STUDIA** nan **aparatonan** completo prome, pa den futuro e tipo di tardanzan aki **NO** mester ripiti.



**** Aki por mira claramente cu Bencho Giel ta tuma su trabao sumamente na serio.**

QUIVER QUIPS E PROME STEELORCHESTRA CU UN CD.



**** Siman pasa a tuma lugar den e luhoso Tasca Torre Molinos, e bautismo di e compactdisk di QUIVER QUIPS STEELORCHESTRA. E joven steelorchestra aki ta duna nan presentacionan tur Diarason den Palm Beach Hotel, Diahuebs na Hayt Regency, y tur Diadomingo merdia den e elegante Costa Linda Beach resort. DEN AMBIENTE ta recomenda pa bo tin e tremendo produccion aki, pa asina bo por disfruta durante Carnaval riba e dushi ritmo Caribense.**